

四庫全書

集部

欽定四庫全書

集部

愚菴小集

卷二 目錄

詳校官庶吉士臣汪彥博

助教臣常循覆勘

總校官庶吉士臣何思鈞

校對官中書臣田戶衡

謄錄貢生臣鍾浩

欽定四庫全書

集部七

愚菴小集目錄

別集類六

國朝

卷一

賦

卷二

五言古詩

卷三

七言古詩

卷四

五言律詩

五言排律

卷五

七言律詩

卷六

五言絕句

七言絕句

卷七

序一

卷八

序二

卷九

記

卷十

書

卷十一

論

卷十二

辨

卷十三

雜著一

卷十四

雜著二

卷十五

傳

附錄

臣等謹案愚菴小集十五卷

國朝朱鶴齡撰鶴齡所著尚書碑傳諸書俱別
著錄此集乃所著詩文凡賦一卷諸體詩五
卷雜文九卷末附傳家質言十三則鶴齡始
專力於詞賦自顧炎武助以本原之學乃研

思經義於漢唐注疏皆能爬梳抉摘獨出心裁故所為文章悉能典雅醇實不墮剽竊摩擬之習其邯鄲衛三國禹貢三江震澤太湖嶓冢漢源諸辨多有裨於考證生平嘗箋注杜甫李義山詩其作韻語頗出入二家之間而寄興清遠亦復自饒神趣至其與錢謙益同郡方謙益箋註杜詩時嘗館於其家乃集中無一語推重之所作書元裕之集後一篇

稱裕之舉金進士歷官左司員外郎及金亡
不仕隱居秀容詩文無一語指斥者裕之於
元既足踐其土口茹其毛即無訥詈之理非
獨免咎亦誼所當然乃今之訕辭詆語曾不
少避若欲掩其失身之事以誑國人者非徒
諱也其愚亦甚云云其言蓋隱刺謙益而發
尤可謂能知大義者矣乾隆四十二年十月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

愚菴小集卷一

吳江朱鶴齡撰

賦

廣志賦

繄我生之耿介兮勵修名而不頗
搴瑤華以抗節兮擣仁義為萬金
遊墳典以漁獵兮懼或中乎虞羅
戢形影於蝸廬兮循繩墨以貞度
彼詭行之昌披兮余不敢以

改步憂歲月之逾邁兮追姱修於古路何流俗之險詖
兮好與惡之迷方珍魚目以什襲兮謂明月其不光繫
威鳳以在笯兮驅罷鶩使服襄嘈瓦釜以聒聽兮毀鐘
鏽而弗錫巧占風於要路兮工樹柵於康莊羣听听以
嗁吠兮索蘭佩而佇憚笯枳穠以昧目兮轉糞壤而自
芳誠嫭姤之難竝兮疇捷徑而能良塞余情之信練兮
秉昭質而難易屑越桂以為糧兮編胡繩以為席被莊
若之清芬兮茹玉英之膏液塊獨寶此幽貞兮匪是時

之攸識惜曜靈之不居兮老將至而為客菊英墜於中
庭兮奄離披而獨立彼獨立其何傷兮哀衆芳之蕪沒
意緯憮而不制兮神惝恍而難持愁沈沈而茫結兮步
踽踽而踴踴懷紆鬱而無語兮思繁亂以長咨迷歧路
而無所適兮索瓊茅以占之將遠遊而散慮兮得吉繇
由於庖羲洞區中之福仄兮利攸往乎八荒簡元辰而
奮翼兮載雲旂以高翔駕蒼虬之婉婉兮鳴玉鸞之將
將風伯儼其翼衛兮馮夷導夫津梁朝發軻於三危兮

夕繙馬於扶木濯余足於天池兮晞余髮於暘谷恨鼈
極之不正兮就朱陽之赫曦弔帝子於蒼梧兮遭炎歎
而去之將問塗於崑崙兮凌弱水而徑度畏北極之層
冰兮謝玄冥之我還忤羌弭節於地首兮膺木禾之扶
疎循芝田以縱轡兮過瑤圃而回車憎王母之白首戴
勝而穴處兮嗤穆滿之騁驛駒驥耳於長衢乘靈風以
來往兮睨下土而心惻紛總總其腥穢兮類青蠅之集
棘鬱余懷其未申兮望清都而伏謁瞻絳節之繁會兮

聽天鈞之將閨叫帝闔而不聞兮邈天皇之難覲向左
玄以陳詞兮剖沈疑於宿昔何履仁而凋年何肆暴而
終令何坎壈每集於翹材何豐隆多享於破鏡半哀之
化虎兮磨牙頃其兄命虬精之化人兮厥勲烈於南郡
何流變之殊形兮理參差而莫定虞忠漢而暴烈日兮
終不逢夫雨師萇叛苻而絕汲道兮竟滂沱而相之何
順逆之較然兮乃倒應而錯施桂必伐而膏必煎兮盍
併絕乎斯類也菉葍榮而枳棘茂兮余不忍見此態也

莊畏犧而賈忌鵬兮固前哲之所喟也彼維皇之降監
兮宜祐善而殄淫苟回惑其若茲兮信天道之難諱左
玄曰吁汝言大愚品物遷流幹於太虛潤潤墨墨實為
洪鑪道混成而條別兮任萬肇之榮枯譬春葩之著樹
兮隨風舉而辭株或下沈於糞溷兮或飛墜於金鋪總
一氣之搏捦兮誰斟酌以差殊是故否兮不可豫泰兮
不可期榮兮不可據辱兮不可辭福兮不可覬禍兮不
可闖子亦訪塞翁之倚伏師老氏之守雌何事懷褊心

之憤懣長伊鬱而不怡承嘉告以廓落兮釋端憂之塞
產溯大鈞之陶物兮非薰蕕之必辨審性命之靡求兮
悟悔尤之雙遣苟精誠之必通兮雖聖哲其可勉能鍛
跡而含和兮登道崖其未晚修初服以悅康兮奚彷徨
而適遠辭闇闔之迢遙兮整飈馭乎吾將反臨舊丘之
菴藹兮遵夷塗以游衍歸班生之故廬兮息揚子之玄
亭眷天路之縹渺兮神迷盪而未寧葺詩書之靚圃兮
踐蕙若之芳庭永端居以擗志兮棲寂寞而存真曠兮

覽於大道兮樂自然以無營庶靈根之內保兮絕情累
於塵纓

徐介白曰出入幽通思玄之間而稍變其機
杼時出新意愴況彷徨此亦楚騷之苗裔也

遊靈巖山賦

鬱西山之崩奔萃扶輿之清淑輩吳會以作標翼帝圖
而建福秦餘飛動以崔嵬鄧尉蜿蜒而起伏天平擁齒
峩之竒穹窿擅曲糺之目玉遞之橫列如屏龍塢之踞
湖子蟲是皆迴福地於人寰錫嘉名於仙錄未若靈巖

之與區為神秀之所族也爰自浮玉倣基天目分隴元
氣所扶冲融湏洞苞巒孕巘控越奠吳俯臨巨浸上薄
清都幹地軸之綱維蘊物華之明雋睨兒列之羣峰卓
靈標之千仞開丹嶂於烟霄挂青霓於風磴軋遊氛以
上千變萬象於朝暝勢延亘以貢奇氣孤清而含潤涵
其戴闕詭狀非一或偃如獸蹲或森如人立或奮
如濤奔或齟如斧割張勢競形空翠滴歷彌天之雲觸
焉斯出又有琪枝蒙密灌木森沉葉舒惟以聚碧花散

錦以成茵蔚春榮之的爍敷夏彩之繽紛轉深林之綺
翼戲曲沼之文鱗激松杉之逸籟飛澗瀑之清音其右
則重湖浩淼驚濤震蕩水豹狂呼靈胥賈壯估舶分風
漁舠出浪抗洞庭之雙峰砥百川而作障挹朝爽於西
來招靈威以極望其左則原田每每溝塍綺織近畛遙
阡菜蕪大闢嵌竇通流桔槔引澤休文之蓄耜可陳

賦陳東菴約之故耜沈約

元亮之耘杖堪植其陽則壘通九陌市走三

衢儲胥廣衍壞貨敷腴士女填溢以教以娛其陰則林

臯轉幽竹苞松茂曲渚平緒分枝阜環湊謝墅庾村逸人遠就洵地脈之儲精而土膏之發秀也若夫山開晉代寺建梁年招提燦日寶刹凌烟堯閣竦乎黔巒香臺鎮乎贊屹嵒亭因岩而構址露井即澗以疏泉虹梁披離以切漢月榭杳窕以干天曲檻周遭以縣亘鳴鈴窓寧以高懸幡幢夐繹而四豎金碧晃耀以相鮮於是策振興公孫綽賦振金經翻謝客謝靈運在廬策之鈴鈴有翻經臺開士駢肩淨侶疊跡建曼陀之蓮臺展靈鷲之法席合能秀之宗

風融支許之辨析殷隱法鼓之轟闔鐸晨鐘之叩擊宣
三乘之奧窓釋五惑之煩惱蓋自智積之西臻會尚忝
以千百洎天監之示圖徵象教於廊壁雖名標志林事
紀僧冊未及今之齊大化於吳會並神光於緇白也爾
乃循岫曲歷松門撫陳蹟按舊聞求洞穴踐礎村硯池
誰為點筆石鼓何以徵兵訪館娃之故址弔響屢之幽
魂悲琴臺之寂寂濯香水之泠泠慨屬鏤之既賜俄宮
闕之成荆實夫差之自燼豈越甲之能鳴嗟乎噫哉方

吳之盛香徑鋪棻璫臺對整花明桂寢之玉人月照梧
宮之金井迄今惟朝霞之絳氣橫空夕燒之荒烟接嶺
彼甲楯雄圖甬東霸骨俱已蕩滅而銷沈而况乎舞袖
之綺羅與粧臺之紅粉覽興亡之一瞬悟生死之同規
物無新而不故人疇寄而不歸譬石火之飈飛如薤露
之朝晞知榮名之難寶信逆旅之非欺曷若依紺宇以
息鉗瘞祇園以屏偽探六度以觀生冥三燔以發智飯
香積而世味蠲遊化城而害馬去巡茲山以陟降兮澹

余慮之紛營溯高深於亭毒兮等今古於埃塵悵沈憂
之促算兮希闇靜以延齡願稅駕於東林兮武宗雷之
高躅仰佛日於覩墟兮皈化人於靈谷庶遊蒙之可謝
兮登薄躬於沕穆

潘江如曰具體天台更加妍整五
色迷宣八音繁會使人怡賞不給

宮人入道賦

夫何女冠之婀娜兮被羽服而體輕夙承恩以入御兮
侍更衣於掖庭忽離垢而遐舉兮豈徒怨夫深宮永漏

之淒清粵自吳鷺焚巢楚猿亡樹鏡埋仁壽之庭弓倚
未央之柱攀烏號而莫逮山陵泣湘浦而長辭月御悟
物理之無常榮悲韶顏之難久駐羞同戚姬侍兒更作
扶風之婦願隨王母使者時陪戴勝之旁於是離椒寢
即雲房捐珠珮理霞裝謝昭陽之隊遊紫府之鄉屏長
門之扇簾裁羽客之衣裳洗鉛華之膩粉爇太極之神
香瀾乃金闕玉臺神棲三島璫枝琪草景躡十洲藥圃
之芝英不落仙巖之桂葉長留乳煉金壺餐紫霞而內

照丹調石髓嚥玄液以冥搜若夫朝瞻羣帝夕禮上真
碧落磬敲縹渺珠函之字玄壇鼓動琳瑯玉檢之文絳
節霓旌髣髴朝元啟醮龍車鳳吹依稀太乙祠神羽帔
却忘垂手舞法歌惟按步虛聲爰有八洞靈妃九天玄
女時來往於空虛每殷勤而延佇許飛瓊要世外之逢
迎萼綠華結雲中之伴侣鶴飛緜嶺聽子晉之瑤笙霞
散幔亭會神君之法鼓寧復憶夫青蛾永卷之悲紈扇
秋風之怨御溝流一葉之詞弱線結重生之願行隨玉

輦曲翻紅藥之欄弔奉金門愁滿萎花之面也哉遂歌
曰誰信瑤臺別有春焚香時拜魏夫人欲將蓬島三生
夢掃盡滄桑萬古塵又歌曰燈照九微天宇闊雲開三
素日華鮮蜀王已化啼鵑魄豈得蛾眉戀翠鉏

徐昭法曰悱惻之音歸于正則貌悴而神不傷

秋閨賦

維四序之平分兮凜素秋之淒景誰駘蕩而不悲兮矧
空閨之孤冷若夫月行白道霜下青腰授衣氣冽落木

天高斑駡未返芳草俄彫玉露彌空溼前除於永漏金
波斜照逗疎幌於清宵雲送千山之曉素水興七澤之
波濤驚去空梁展魚簾而不樂鴻來北渚撫玉枕而無
憇於時撼葉鳴梢哀蟬去翳看羅帶之漸長覺瘦腰之
轉細菜萸幔裏風掠鷺尾之髻玉鏡臺前光冷鳳頭之
髻芳辰謝兮倚寶瑟而誰彈沈思增兮對金樽而掩涕
綦履遙兮惜蛩砌之苔生房櫳寂兮嘆蛛絲之網綴所
以霏霏銀漢難傳錦字之情晶晶玉鉤不斷高樓之思

爾乃京洛之英鄒魯之子景漢伯隨師七州葛稚川負
笈千里絳帳未歸金風忽起能不目睇桂枝魂牽槐市
又有商輶遠道估舶河梁載離塞暑幾隔星霜上水之
篙時汎百丈鏤金之椀誰與雙行河鼓星槎愁結三洲
之曲洞庭木葉夢迴七寶之牀乃若代北沙昏榆中候
晚出紫塞以遐征佇青驄而不反寒催刀尺憶襆袴之
短長望阻帛書昧關山之近遠羅幃悄悄占華萼於銀
缸虹箭沈沈冷麝熏於玉簾以至棄婦長辭故雄永去

離鸞之曲孤彈別鶴之悲莫訴空庭銷蕙艸之芳夜織
斷鵞機之素秋風厲兮團扇捐秋月清兮流螢度秋聲
凜兮羅袖單秋氣肅兮鉛華暮當時也莫不愁黯黯
而難勝淚浪浪而欲注夫候偏驚於徂謝感獨切於變
衰壯夫為之砭骨驥客以是興悲登山兮傷白道臨水
兮慚青谿遠行兮悼羈旅送歸兮悵別離彼四端之竊
矯皆千古所歎歎曾未若中輕寒於玉膚引涼颸於繡
闌驚一葉於空闌感雙星於令節結永戀於征輪寄微

情於皓月窮時變之蕭森萃人生之騷屑抽思緝之纏
縵殫情條之飛越乃為亂曰繫大化之回斡兮獨春蠧
而秋愁非金商之肅殺兮豈知治日之和柔彼佳人之
令艷兮固難遣樓頭之蟾兔與林下之鼯鼴誠物感之
自然兮吾獨何恨乎尊叔

金孝章曰道文壯節抑揚
哀怨在明遠文通之間

苦雨賦

維青陽之應候兮抽英蕤於園林將娛目以步蹀兮悵

沈雨之滯澑谷風扇而轉緊兮膚寸興於高岑俄重雲
其四合兮靄八表而成霖於是堦涌伏泉庭深積潦義
馭潛暉號屏先道柱礎滑而不前櫨溜滴而難了行路
斷其輪蹄房櫳迷其昏曉爾乃欲絕復續自朔及旬晦
冥連乎八極決漭塞乎四溟疑漏天之在近嗟墨霧之
無垠豈銀河之欲倒抑地軸之將傾何天網之蕩潏絕
愍念乎斯人曾不顧郊壘之價涌於玉粒而曲突之烟
沉於桂薪於斯時也嘉木吐鶩鮮枝擢翠都尉之棗垂

條司空之楊拂地但見雨足纏綿雲根霑靄對日方閃兮
更沈沈霧欲披兮還颯颯朱萼匪陽而不舒絳英負靄
而多墜庾園之濕羽難飛陶徑之水衣徒清小山文士
攀芳樹而無從楚澤放臣采幽蘭而莫寄誰不愁后土
之不乾望層陰而增喟嘆僕本恨人索居騷屑目黯黯以
不開中悒悒以苞結阻城闕兮迢迢周泥淖兮活活對
朝雲兮漫漫瞻暮曖兮憊憊炳燭照兮堂中添漏痕兮
檐未陳書策兮無憇遣明尊兮不悅安得誅飛廉屏豐

隆絕雲氣見夕虹散靉靆收溟濛升赫曦於扶木鞭火龍於天東普昭融於萬象回陽曜於三春也耶

汪昌文曰婆若繁絳爛如錯繡既具賦心兼饒賦材當今誰是敵手

枯橘賦

猗嘉樹之歲壯兮寔挺生於南國維騷人之頌厥美兮秉不遷之貞德奄枝榦之離披兮抗園林而無色哀靈木之變衰兮撫枯株而太息爾其始也連彩璇星植根瑤圃陰成綠葉含耿介以凌霜萼吐素華散棻芳而入

戶佳人以是盤桓翠羽于焉翔舞迨夫清霜變律白露
零庭實垂金而攢布帝連理以宗生本自瀟湘薦彤廷
而包隨錫貢非因羽翼登玉案而果以珍名紫梨方其
津潤柘漿失其甘馨所以樹重江陵每置官而呈瑞功
標本草恒蠲疾以祈醒者也無何氣改窮陰衰催急節
榦背日而凋傷條隨風而驟屑漢上苑之玉樹既失青
葱楚三閭之木蘭俄成萎絕晨曦照耀欲彫飾以無能
暮雨低垂訝芳菲之頓輶嗚呼半死嗟桐先伐嘆桂昔

日婆娑今朝顚頷鄉林改色誰看蜜葉之垂陰嘉蔭無
存共惜修柯之委地曾不若櫧梨澀口猶自遂其敷榮
椒榦含辛反得矜其生意觀物理之彫換兮固有盛而
必衰誰芳根之久植兮誰靈露之長滋懼徙北而化枳
兮寧就槁而不辭彼人事之遷流兮紛莞枯其若斯任
大鈞之回互兮何必泣然於攀枝

顧茂倫曰本猶頌之意而衍之不徒作榮枯之感綺合呈惆特具餘技

白鳥賦

方塘浪暖在渚波清何來素羽蕩漾身輕隨流泛泛矯
翼星星脛短而常依弱藻臂丹而能自呼名時臨波而
顧影恣游泳於沙汀友白鷺兮抃舞對皓鶴兮低鳴非
稻梁之可豢豈絲綸之能驚其浴浦也似鷗羣之戲廣
浮深而浩蕩於波濤也其宿渚也似雁族之顧儔命侶
而行列於葦蕭也其飛旋也又似文練之搖颺太空而
點破乎青霄也若乃浪花朝起映旭日以開銷江烟夕
霏負清風而竦翼乍臨綠岸以依人忽入叢蘆而難覓

澹容與其翩翻雖卑飛而自得至若飲湍流啄藻荇唼
爵蘋花汎洄木梗不爭肥於粒食不受縲於軒屏恒宛
頸以相呼狎風波而無警此又智於鷁鷀之處身而安
於鷺鷥之屈猛者也嗟人世之局促兮歎吾生之艱虞
何此鳥之容裔兮烟飛鳴其自如循瀨涯以盤桓兮羨
美羽之遊娛願相從夫漁父兮長適性於江湖

計甫草曰清藻斐然興寄絕遠
如此作方可當體物劉亮之目

誅蚊賦

令届朱明日行赤道永晝炎蒸清宵膚撓汗槃點案既

惡青蠅布翼逞鋒尤愁白鳥

蚊一名鳥

厥種維何芸生濕

庫鷗母吐於嶺南

鷗音田此鳥叫則
吐蚊見嶺表錄異

黍民蕃於河內

河內

有人見人馬如黍米往來燒之皆蚊見古今注既秦楚之殊名

秦謂之蚋楚謂之蚊實羽

羣之醜類厥狀維何眇小莫儕利觜有針芒之刺狹翅

為暗室之遊非處緝之蚤蟲類撼樹之蜉蝣蜞螟巢而

不覺

東海有蜞螟巢於蚊睫見晏子雲臺之高蚊蚋適

以翾翾見鷗冠子

其始進也背明向晦來若有求去如失意同隙乘疎翩

羈鼓翅豈負山之足噬

蚊負山見荀子

徒銛喙之是肆其引類

也翕習相偕彌空布濩合響轟逐既薨薨而結陣亦殷

殷以成雷候崦嵫之既暝遂虐蟄而為災若夫乘集南

皮樽飛北海娛賓之賦方成揮塵之談欲罷忽中叢以

互驚交筭蒲其敢怠縱作力以驅除反沓來而增倍至

乃晝困炎歎宵思美睡車囊之熠燿甫息書帷莊蝶之

栩蘧俄親夢寐竦迄刺以交加頻抑搔而不置華胥失

其嬉遊姬旦何由髣髴此尤文士為讐言蕭齋莫避者也

相爾纖背空利如錐洞房垂其綃帳繡闌蔽其羅帷遂
回翔而莫入雖含毒以安施惟是赤肌之賤客與露體
之孤羈肆吞噬以無厭^{音攬}稽康書臍^{音擗}之不置通夕而不離其

饑也載翩其飛其飽也有殷^{公間}功^{其腹但求吮血與臂}

膚寧顧意盈而禍速墜銀燈兮不知觸絲網兮相續又
况秋風掃之於林端霜氣沈之於水曲奄忽無存檐宇
斯肅窮子安其晏眠高齋適其牀蓐然後嘆爾曹之孽
生特害氣所亭毒既金行其廓清曷不永珍乎斯族

吳弘人曰工為形似之言詞
旨警切勝歐陽憎蒼蠅賦

冥異賦事具尤悔菴所撰

汪金女小傳

夙皈心于度門兮維大士為得牛車時現身而變相兮
信佛種之非賒覽傳記之靈異兮奚啻竹葦與蓬麻歎
汪女之篤生兮墮地而如從佛口也妙莊嚴之色相兮
僉曰瑤華之不偶也時白衣之分身兮化道媼而來誘
也繫沙竭羅龍王之有女兮八歲而知慧利根一切能
持受也洎寶珠之上佛兮坐道場于南方無垢也維龍

王之燁赫維龍女之蟬媛咸深入于禪定羣列侍于普
門獨玉瓶之誤碎蒙譴謫而託塵根歷六年而居濁世
殤七日而歸泰元昭媼言之不爽顯夢兆之同涉洹洵
年尼之貯清水不久翳于塵凡彼夫萼綠華之降羊權
杜蘭香之偶張碩海山多累于幻緣兜率自超于火宅
嗟飈馭之早迎兮背高堂之太迫人誰能以忘情兮沿
萬里之黃檗昔金瓠之十九旬而夭折兮子建尚著之
哀詞矧半紀之降生兮跡靈異其若斯知寄歸之一理

兮悟冥顯之同規抒蕪辭以警上慢兮庶覺路其可追

愚菴小集卷一

欽定四庫全書

愚菴小集卷二

吳江朱鶴齡撰

五言古

結交行

莫以芳桂根而逐槿花榮
槿花終不老旦暮容色好
解

堅冰雖可踐足底翻波濤
人生果意氣何事薄錢刀
二解

子頡我則頑子衣我則裳
衣不因故厭裳豈以下妨
三解

素心交可久誰能紉荆棘坦步交可親誰能枕矛戟

四解

布短不成稠水淺不成流阡陌自有道但恐心悠悠

五解

葉聖野曰翻得絕妙又曰古

澹清深是唐人樂府佳境

感遇十三首

吾生本天植廓然棲靈根神明坐搖蕩遂與狂流奔風
波得深警萬感寒心魂賤貧生易達寂寞吾道存庶幾
屏形累出入無窮門

朱明未云滿龍火已西移日車無續景壯士安能持一

葉墜庭柯寒風栗我肌老壯更相迫蚩蚩欲何為榮華
爭努力祗供霜霰欺誰見西山藥可駐百年期

天道有波瀾山雲誰為主蓬瀛今不流安得朝市古金
狄酸秋風銅駝埋宿莽姆豈辨青門人當年乃萬戶蟻

蟻升天行潛蛟失其所感此淚恨恨含辛不得語

敗葉鳴空堦號蟲弔秋影默默誰與娛憂憂互相引達
人感無生志士抱遙省苟無繁霜驅安得腐草屏天心
警虛華物性趨嚴冷徒深顛頽悲此意誰能領

流雲本無陰日昏氣隨變桂蠹非一朝桃蟲生隐患但見一葉秋已知三陰晏如何守蚩蚩倚伏失前算天運忽已移山花亦彫換禍樞豈無因徒令識者嘆

易填東海波難鏟太行險太行方寸起一步乃九坂鋒矢日相尋毒流及玄冕柏梁隨草根瓜蔓終不剪往復見天心殺機還自踐悠悠白馬津千載同情憇

牢籠隨吾身何處得寥廓患害生避趨昧者自相索斷梗豈無依藏舟終走壑坦然任幽貞四隅各有託胡爲

東西馳徒作雕陵鵠

熊羆不相啖梟獍不自戕人則甚于斯生理安得長儒
教發大家陰符蓄不祥古聖貪所務遂開後世殃傷物
無獨利愚者乃爭強干戈終未已勸君且後亡

峽中亦有日海外亦有槎我生獨崩迫沈憂浩無涯出
門愁滿道入室愁滿家芳蘭骨不立叢菊秋空花萬物
非可悅百年誰見賒如何違此性役役隨翻車

山南生美棗山北生蒺藜受氣雖有異歲寒同枯枝青

林改白道故社成新墟萬物皆隨運吾生何獨悲策杖
爭絕景徒為後世嗤不如守衾枕昏昏無是非

黠鼠貪空倉青蠅慕遺汗但與吾性違驅之恐不力出
門各有營寨步安所適鷹眼自堪憎鴟林不可息矯首
望高原烟草方亂色寤言誰與期山川阻良覩憂至克
朝飢長嘆聲惻惻

神龍無尺木反為螭蟠陵芳蘭生匝牆亦隨蕭艾零小
人甘齷齪安知楹與筵黃鐘奏鏗戛反謂蟲鳥鳴神物

不可侮侮之見精靈君看百丈漱怒蛟誰能曾

赤日盪靈魂秋水澄心胸覽觀良已久何用謀去從蚍

蜉享朝景自謂百年躬智愚迭相笑萬古同夢夢西南

望懸圓光氣何熊熊玉英無敗色靈草有鮮容誰能追

羽駕煉藥瑤池東

史弱翁曰諸作感愴時艱出以身心性命之語其中
包孕甚深厚高者可與曲江頡頏麟臺篇什雖繁遯
其含蘊

同茂倫樵水長發庶其小集介白齋中得落字

驚飈蕩高柯肅肅鳴霜擣江濤引寒烟飛向檐前落激
懷不得平感物增淒索維我二三子高言振靈魄主人
方據梧蕭遠命東郭瞻矚生清風嘉尚各有託壁穿竹
氣涼座汎山光薄獨樂有清吟草廬非寂寞

春雪

凍雪合平疇來自陰山窟吹我曲房前奪我瑤臺色嶺
雲寒不飛朝幌透無跡春動百物暄一時斂青碧高下
均浸淫衆芳失其質不感陰氣深誰知太陽德

介白曰情景沈
冥不待著色

贈史弱翁

白日殘清暉
宵光安可補
魚鳥失飛沈
珠玉成灰土
文章不庇身
處晦惟園圃
嘆子雙鬢斑
羈窮共誰語
驚飈無靜柯
飛鏑多危羽
旌旗滿中原
登笠適何所
同袍事已違
故琴猶堪撫
安得東臯田
偕子藝寒暑

寫懷寄陳鶴客兼呈禎起諸子

物情各有求
靜躁殊所秉
反幸冠蓋疎
趨馳謝榛梗
飢

來安可驅踰戶即嶺嶺以斯鑒薄躬戢志恒內省鶻鶻
來新聲棠梨獻晨影澹澹林樾清蕭間意俱永經史足
自娛亦貴晉以猛陟巘必層巔汲深豈短綆睂睂矜所
謀止供達人哂此意誰與同沈憂抱炳炳晚交定陳生
托懷類便靜真氣照軒楹清文發光顏燕石時易珍良
鏐獨畱礪知希何足歎立身尚孤耿靖節與文中古道
常接軫我將傳高士風義勗公等

俞無殊曰讀古學道之言自與浮采
迴別真氣照軒楹請即以贈此詩

吳門晤陳言夏

漆園尚天放正則敦修名彼皆處塵塈心跡能雙清如
何鸞鳳翩下與雞鶩爭陳子秉冲素讀古他無營蔚材
托嘉遯抱甕甘柴荆吾觀夸毗子求索何所成古人事
枯槁亦在揚德聲幽蘭生菉葹香澤終自明子其寶貞
曜軒冕無長榮

葉聖野過訪

新旭霽南榮松齋淨如滌風牀眠抱書誰與展良覲葉

子忽披幃一笈忘主客慰藉無枝言論文遂通昔卷幔
月魄鮮篝燈露華白方果同食期頓深分手惜送子出
林間悵望滄江閣羨彼南征鴻飛鳴逐文鷁

介白曰奕奕清
令流動自狀

葛瑞五同呼德下葉九來過訪

草薰麥隴秀花暖楊園烟靜影室生白朝駛啟暄妍有
客來衡門巾屨何聯翩一見愜心許中懷罄所宣十載
託芳訊疏麻誰為傳今茲攬襟裾如握蘭與荃新知自

古樂況乃嘉遯賢君操白雪調我鼓朱絲絃風義既云
合夔蛇豈徒憐綺饌且勿陳斲菘烹小鮮酒酣發高唱
夕露霏長筵雲房見微月撫枕不得眠衆女競謠詠孤
芳長棄捐文章非小技鏃礪窮前賢勉勵敦所務何為
歎屯邅明發帆去烟浦心旌兩懸懸願因晨風翼寄我
瓊瑤篇

孫子長曰高情發以嘉藻古義傳以妍辭人淡如菊文動如烟吾今于長孺見之矣

送唐鑄萬移家金陵二十韻

江雲覆春渚荻岸風颺颺念子始波濤旅泊何時休子
昔來武林笑言未三秋花嶼共巾舄雪籬交唱酬歎焉
處衰經生理攢百憂愧無監河粟周子食指稠交態匪
獨今志士當自謀葛帔憐孝標薄俗有此不子今徃因
人因人慎所投刈薪母枳棘掬水母池漚枳棘難為爨
池漚豈成流嗟我薄遲暮畏人寡朋儔親子十載餘形
影常相求萬里方永餞河梁重離愁撫存兼悼往雙淚
不可收曾酒缺倉卒把袂聊淹留亥甲未云解大江高

浪浮豺虎滿周道
豈惟戒陽侯長年
正五兩轉眄成阻
修行矣自勉愛音書遲去江郵

王玠右曰真摯之情浮動行墨中間忽入樂府調頓挫激昂意味淵永讀之使人留連

金陵王元倬寄南陔詩有贈

大道日湧散立名求其真傷哉秦士賤素衣蒙垢塵理色一以辱奔驚徒云云飛蛾赴華燭蹈死誠所欣寧知七尺軀育鞠來苦辛胡為愁置之乃曰榮吾親南陔序詩雅色義敦先民豈必飯脫粟不齊八物珍吾欽太原

傑志決無逡巡懸車十餘載甘與樵叟隣既躬板輿御亦饌清江鱗譬彼雲中翮皎皎儀秋旻安能學鶴翼低頭飲洿津龍從鍾山色植此凌霜筠黃塵縱昧目亦辨玉與璠丈人且安坐釣瀨終蒲輪

介白曰氣格嶙峋如登閬風
之臺下視塵界皆蟻垤耳

哭董次公

寄歸本恒理斯人抑何遽丹鉛恭此生棟竈甘所遇著書書未成飲恨泉臺路陳篋理遺文拊膺淚如注軒除

霜月清髣髴音容度太息天夢夢巫陽不可訴湖波恨

蘇范誰與致薄溥

秋日有懷四首

秋容淨如洗雲衣覆綺席高桐晨露流素幌映虛碧瓜
架蔓已除蘭畹香猶襲安得同心人相攜度阡陌

入門徒有懷出門復何遇隔水稻花香沿村漁火聚霜
葉丹平林一望物非故縱有西山童衰顏豈能駐

長空蕩金波圓魄盈三五熠耀火穿林墉皎絲織戶北

里喧笙竽南隣困簾簌索寘對清樽素琴為誰撫
灼灼紅芙蓉有期同采擷遲君君不來鄉澤坐銷歇鶴
警遙寺鐘烏啼廣庭月撫枕忽長嘆幽懷耿明發

申亮盟曰秀氣閒情清音俊節如
此學選體吾亦何嫌其膚革耶

寄徐介白

美人今何在抱膝靈巖側秋花秀綠增清賞散縹帙間
門幕蕪蘿空翠嵐烟入臨流藻網清掃葉霜痕積瓜田
手自鉏抱甕汲深夕新詩題絕巖不使人間得自古高

賢儔入林恐不密愧余婚嫁牽微尚徒快悒別來歲月
遙身世逾幅仄相望五湖西迢迢隔方域離憂結中腸
披寫定何日雲停北渚寒雁唳長空澀終當攜春醪醉
歌仲長室遲我梅花開松風理瑤瑟

茂倫曰淡而綺綺而不
繁氣韻欲流匪心獨妙

黃陶菴先生殉節乙酉兩世未葬懿弟上枝拮据
舉襄賦此志感

嗚呼江夏英磊落青雲器持此歲寒心慷慨赴明義晶

熒練水濱碧血照天地獨憐淺土中四喪未歸瘞夜臺
遺恨深耿耿目猶眠有美見天倫鼎嶺營所事靈輶出
郊原執綺四遠至鬱鬱京兆阡宛宛延陵字庶以答義
昆貞魂可稍慰弔鶴空飛迴束芻阻迢邇瞻龍雲高
攬筆發深喟

筠在禪兄過我荒齋艾山夫趙砥之繼至談咏竟
日率爾成篇

拂拭夏簾清炎歎晚彌熾曳屣迎高人涼風颯然至筠

師久逃禪撥棄人間世一別逾三秋重來起昏寐示我

二賦

天台
雁蕩

奇琅琅金石陞興公未足多揚馬可同轡兼

攜將生

馭
開

詩卓犖富瑰製陋彼詹詹言陳根徒委翳展

讀坐忘疲小巫深予媿羲羲巾舄來爻趙同夙契諧談

無古今所戒雜聲利高者破玄闕下者析奇字角論如

涌泉胸臆頗得恣是時蘭風清日車轉庭砌瓜茶似僧

寥冷淘間乾拗終年困塵嬰頓爾發神智皆云此晤良

惜別屢牽袂吾衰久矣夫心跡多蕪累公等施鉗錘或

足謝天劖所恨相見稀形影俄離異明發隔山川此夕
同樸被聚散何足云浮雲本無繫

毛大可曰疎疎浩浩頓挫自老此種格韻仍從少陵得來

初夏過嚴園二首

薰風動隴陌萬類光融融羣木領森秀四野彌青葱名
花映朝幌煙霧霏空濛好鳥間關鳴樹頂和絲桐悠然
感物化斯意誰與同

林氣晨夕佳松竹臺遙翠攤書坐東軒日移花影墜文

禽不妄飛野叟時一至苔堦有餘清睇髮此焉遂對酒
情話多藉草不知醉

無殊曰調近韋柳實得選體之深蓋韋柳詩全從陶
謝得力左司尤澹遠近古顧華玉謂五古先學左司
然後諸家可入誠不誣也今人作五言古類知宗選
然掇拾成語神韻索然矯枉者遂以學選為戒豈通
論試

寄王西樵吏部兼呈阮亭工部

玉質生荆岑光剗櫟中見珷玞冒連城五都誰能銜風
驥本同源作者代游衍古調歇不彈新聲日流變根荄

苟不存枝葉徒浮絢夫子實起衰英雅欲兼擅哲弟稱
二難珉珣世交美聯翩翔藝林婉若雙飛燕賤子復何
知一經守孤狷徒然仰蓬壺末由侍壇壝義白雪樓
蔓草已深纏瑯琊今嗣興風軌扇羣彥慚余非子真名
字京華恩迢遞燕山鴻短章託深眷雕蟲祇自嗤敢覬
相如薦

春日郊行同趙徐二子

拘情若鬱陶有如困闌閨忽思郊原遊山川曠吾眼步

屢出城闈同心得嵇阮登頓迤湖濱心目始一展是時
朝霽初盈畦露猶泣碧草亂如烟晴絲天外胥鶯啼何
處深花雜無煩辨雲濤萬頃平翠屏列西嶠波橫樹影
新風遞漁歌緩憇石野趣縵流古懷絇由來賢達人
何事釋巒崕壯士多荷殳英才或賣畚今吾辭二塗飽
飯顏猶覲况值春氣柔暄妍物情善營營欲何為形役
滋煩惱縱成榮與名所得羸甄羸放懷不知疲往策竟
忘返恨無黃公壚揮酌共沈湎明當攜濁醪餘興盡遊

衍

吳六益曰道情絲邈
非嬉春玩物之言

過周安節館齋小飲

南莊沈氏居寥落百年後五公號聯珠此地窮蝌蚪到
今讀書臺森森蔭榆柳諸孫雖食貧素業頗自守蘭芷
紛叅差圖書粲左右周子坐其間高吟動林藪見我來
于于四顧問升斗篋中出新詩清音散瓊玖簷靜鳥踏
枝簾疎花覆牖主人出畱賓羅列陳脯酒深愧空樽愁

傾倒情良厚高軒矜少年吾輩憎老醜陶公素心徒交
態能復有感今更懷舊此意向誰剖婆娑暫開顏陶寫
忘白首挂策出前邨黑雲連林阜阡陌迷所從沿溪問

漁叟

懷俞無殊

昔別春風柔武陵花亂發今茲大火中土膏競耕垡東
菑曳孤筇矯首望林樾老去戀舊交情來惜華髮竹風
響素琴松露流華月悄然離思盈扁舟待超忽無輕行

樂期庭草芳未歇

寄筠在

乾坤遘明夷志士無坦步艱貞義所激不皇家門顧吾子至性人集蓼甘如素自歸祇樹林藜覓不飽茹清餐柏子香潤裛松花露梵唄逃塵緣空王引覺路去秋叩我門顏色殊非故問答始驚呼涕泗紛如注憶昔旅敬亭與子共情悰聯翩宛溪濱朗詠玄暉句翻掌三十年世事蘿黃霧相對各吞聲不忍更陳訴媿無巾屨供徒

有胃懷吐子今汗漫遊杖錫何方駐風塵忍辱先況在

落增羽金沙道侶稀且往靈巖住靈巖梅花開逸人文

詠聚二徐介白皆子儔寒香可同賦會當拏扁舟一笑

昭法

雲中遇

遺興五首

非廉家不貧非讓身不賤廉讓皆為名名臻行亦陋道
腴與俗榮二者中徒戰所以充隱流高士蓋同傳誰能
辨妄真勿為浮名牽浮名不可居閃忽巖下電

豫章生深山七年已見竒歲久又得地剪伐無從施霜皮與黛色參天勢崔嵬下無蟲蟻蠹上有神靈持天子建明堂棟梁安得遺匠石一朝顧何嫌采用遲

吾有太古琴鼓與不鼓均縱鼓人不聽視同瓦缶鳴況兼箏笛奏悅耳多新聲水調既噍殺入破何砰鈞吾欲匣此琴以俟夔曠生夔曠不可作古響終泯泯

齊純製團扇清風涼慢膚炎蒸一以歇棄捐在斯須棕拂雖微物用與白羽俱秋深蚊蠅息爾亦隨屏除豈伊

人情變自由時令殊君看園中花幾時色敷腴

山木不材壽雁又不材烹材與不材間何用深較量去
者溫自滅來者波自揚吾生石中火成虧豈有常蛇蚘
與蜩翼一任天機行能以無用用乃遊道德鄉

朱錫鬯曰深得蒙莊之旨氣調逼近香山

延安趙玉譜過訪

君昔別我去豪氣不可羈君今叩我門似訴津梁疲問
君何為爾一官數太奇通籍十五載奔走足常胝昨始

令蕭山蕙絲美足怡撫軍疏別補輿蓋不得施理須重
赴部行色能無微旅雁催人老江花送客飛不知四海
內手板向誰低余聞三歎息宦海古所悲流坎非由已
一任天公移郎官宰百里此職未為卑本期傳循良行
役安得辭況君先司馬威望震三陲家聲今可起十年
秉戎麾為君歌愛勉勿愁羈旅為

侯官陳侍御過訪兼枉贈言次韻奉答

急節凌歲除寒威凜森木霜凝負日桐雪覆侵簷竹兀

坐守遺經未遑栖抱犢十指成凍皴簡端盈筆錄美人
振朝纓文字馳卷軸忽枉高軒過窮巷訪跼伏兼貽金
玉音字字堪三復媿我滯衡門祇同握粟卜老忘去似
師舟一卷難柱腹稍延炳燭光敢並晨曦昊大業在千
秋相期矢巖谷

徐健菴太史過訪

亭林余畏友卓犖儒林奮貫穿經史籍事事精考證韻
學榷休文尤得不傳蘊叩擊恨無從遊輶眇秦晉宅相

今已興珠玉朗輝映三張才並雄景陽名早成酷似舅
家風吾黨推淵鏡惶惶苦土中三禮析幽曾紆駕無卮
言經疑勤討問同心計與吳甫草弘人存歿多贈時贈愍余空
橐垂兼金助雕鋟此誼求古人暄色回霜鬢斗酒媿未
儲無計留鞍鎧交道從此敦人知重萬徑

朱錫鬯過訪時膺舉將入都

相國門庭高孫枝盛繁行韋經與魏笏傳家未云忝子
蓉懷儁才錫鬯霸文苑相攜入竹林時推大小阮望望

一水間韭溪清且淺形跡何參商如隔坡陀遠席門忽見臨蘭風拂嫋子昔遊京都才名噪軒冕今者徵賢良一舉親禁繻豈無傾國媒行見霜蹄展如余悠忽身自安鑿齒塞江干肯維舟木榻同息偃

周青士曰輕倩生動白香山所云清脆好詩篇也

贈學究周翁九十

紺髮逾耄耋方瞳逼期頤非脩導引術非具神仙姿乃是元氣全淳行天相之自小戒南陔嚙嚙篤連枝詩禮

作襟佩章句當鑪基門廡生徒滿高座稱經師每逢賜
醣飲時見朝月支外臣雖草莽耕鑿皇仁貽銜哀陽九
尾是日必連而當年乘軒客此義誰能持對翁冲和氣
無異遊皇羲羅拜多紳弁推我前致辭我亦太古民貢
諛安能為表翁耿耿心勝頌南山詩

吳弘人示余漢槎秋笳集感而有作

古業衰制科紛呶尤六義茅靡萬歷時矯枉啟禎季瞽
學趨空枵識者深嗟喟竟陵焰稍燐王李波復漬二軌

分中途作力徒艱屬時余謝諸生服古心如醉謂此何
足爭當汎三經緯先探騷雅源徐整建安轡六朝與三
唐錘鑪總一致誰能奏咸韻可使闕懸肆誰能盈囷倉
止拾遺秉穗自憐起孤生蹢躅音無嗣延陵有季子俊
才拔流輩晤語廓心胷相勗張吾幟奈何急科名此路
多軒輊自矜才地高繳弋安所避一跌遂蹉跎追遯遐
荒置彼土蛇虺都人跡罕能廁雖營板屋居詭狀堪愕
貽袞再二十年音容想顚頷魚雁斷飛沉莫遺相思字

忽見制作新卓犖諸美備排奡摧摩株蠢容貫組璲長
白賦尤奇班揚堪鼓吹更間走筆就使余心神悸由來
放逐塗多是才為崇嚴霜玉汝成瑕玷無終棄蔡邕髡
朔方未久弛吏議李白竄夜郎中道蒙恩賞如何間世
英長使禦魑魅方今綱羅開軒材咸得試輪囷獨見遺
構廈安能遂涓涓勞我思旦晚金雞至

獻曹秋岳侍郎三十韻

神劖埋塵匣價無十千酬拭以華陰土晶光燭天流皎

皎雲中鶴少時同鳶鳩終藉啄匏力高鳴羽修修古人
悲獨學志士厲冥搜所以昌黎翁柏馬招之果余生困
闌闡著作不一售老思獵經苑目短力苦迺磨丹而清
墨聊以當鉏耰漢宋分軌轍誰與割鴻溝昧者左右之
爭馳挾其輞今欲衷至當令彼息啁啾雖云覃考索尚
欲窮詰諷媿余孤且陋陳篋無異蒐每思經籍廣何啻
堆山丘譬如求玄珠必為象罔遊又如折若木必上崑
崙頭撞鐘今以蓬蠡勺祇自羞窮老歲已晏悄悄抱沈

憂夫子文章伯儲書罄九州琅函與玉躞祕冊無不收
久思御元禮廡下或見留恣覽甲乙部采掇兼校讐庶
幾成綴緝得以垂千秋今者遇吳趨歡忭不自由屈指
儒先撰生平目未謀從此得津逮宿願非悠悠開張鴻
寶祕聖涯與沉浮將假梵宇寓或望班盧投所希注愍
惻勿使空綢繆

答贈吳慎思七十韻

具區天目來厥勢何蕩汨七十二溪注濤瀾駭溟渤包

山有靈威精怪時出沒松江承下流襟帶控吳越往往

異材生山水爭磨戛元季陶謝名

陶振

謝常鐵崖度津筏

陶

皆楊鐵崖門人西村文巨公史鑑與沈石田

謝常鐵崖度津筏

皆楊鐵崖門人西村文巨公史鑑與沈石田

謝常鐵崖度津筏

父與羨長

王叔承俞安期

才氣嘉隆杰浩瀚千萬言公卿皆折

節達者推周顧

周恭肅公用顧學憲大典

錘鍊功微乏此外遂寥寥

菁英疑欲歇木公有俊聲

潘桂

一中道俄夭折沈生工西

崑

沈自然

徐史耽幽寂

徐白史玄

偏長頗自矜大山一丘垤世

變逾三紀風雅未銷滅漢槎萬夫秉瑰麗才突兀高笑

睨人寰爾曹甕中蟻忽罹繒繳驚邊沙坐囚紲驥去天
閑空嘶鳴但凡骨塊獨寡朋儔支離守窮跡鳥聲散晨
暄花影搖夕月詩成無共酬酒熟惟孤啜露榭風櫺間
誰來成主客自謂長寂寥意氣無開斥見君岸幘過頓
覺牢愁豁談笑風雲生開誠吐肝鬲新詩更起予一往
才奔軼采擷富青箱何啻千雞跖如觀廣陵潮萬兩車
轟轡如張洞庭樂百神聽呵喝君系本韭溪皇初盛門
闕至今徒貽垂古木繁由笄諸父負時名交籍滿江浙

尊公起巍科一官棄飄瞥君囊隨宦遊歷覽凌窮髮貯
奇懷抱開攬筆恣起忽嗤彼噉名徒未嘗走干謁鈍翁
驚見之嗟賞口不輟他人有是非落落非所屑顧獨窮
卷臨贈箋屢搖襞鄙人學殖荒門戶尤單子鼴勉述作
塗時輩動排訐媿如鉛刀鈍朽株安可切中歲棄儒冠
時事遭崩坼興感少陵詩崆峒扈羈勒箋解遂云多正
義頗昭晰因及玉溪生艷章示準的本原出風騷非為
使事僻嗚呼冊府繁浩浩煙海積六經定聖人苟舉羣

言液奈何衆說淆幾使微文溺末學不自量妄意加剖
析詩申小序古非與考亭敵書掇二孔義止埤九峰缺
春秋辨凡例諸傳敢據據矻矻廿年餘鈔撮窮日夕清
羸遂不支筋力空疲蒼耳如許亟聲目似張籍瞎尚希
探易理象數渺難說近服來瞿唐餘子多會粹戴記陋
陳氏東發鈔頗覈衛湜羅羣義最殘須討索惜哉歲月
慳逝矣桑榆迫此事託無人憂心耿如剴得君振古才
投分比鵠蟹但恐從進士今古分塗轍所禱速騫騰一

朝焚帖括盤覽百家言
覃精古先籍吾書縱有成安能
振被褐遲去君奮南溟為我終剖劂

詠史二首

南箕誰見簸北斗本無挹提壺非有漿促織不成幅舉
世循空名君子須責實王衍惟排牆殷浩終廢陪高名
竟何為徒以禍人國處士盜虛聲自古深歎息雖有聘
弓招達士不輕出出者惟隆中高駕邈難匹

鬻爵本秦令漢武兼均輸榷算籠商賈尚未及文儒延

熹賣侯爵西園爭驚趨鴻都置文學微蔑皆天衢紛紛
立圖贊無乃汙詩書是時殿廷內黑龍十丈餘青虹垂
蜿蜒同時見玉除祆變應何速天人理不誣

愚菴小集卷二

欽定四庫全書

集部

愚菴小集卷三

四

詳校官庶吉士臣汪彥博
助教臣常循覆勘

總校官庶吉士臣何思鈞

校對官中書臣田尹衡

謄錄貢生臣鍾浩

欽定四庫全書

愚菴小集卷三

吳江朱鶴齡撰

七言古

空城雀

青雀飛青林下上聲唧唧夕乳空井中朝貪野田粒不
羨玉山木何來網羅逼豈意烈飈舉戰血淋城隅道逢
新鬼哭繞樹驚相呼空倉絕飲啄毛衣日鼯疎嗟乎生

靈滿城尚枯骨况爾啁嘈安所息不見齊雲樓下火燒
天絶干凍雀飛無翼

孝章曰意調悲
激不盡歎歎

寶劍行

寒芒銳銳蒼龍精吐景流商寶氣橫光淬鸕鷀照秋水
繩懸麗轂連星文夜中風雨時飛去匣內蛟龍殷上作
聲君不見赤堇開若耶涸歐冶鑄來天工錯又不見楚
山雄吳水雌至精不隔會有期神異千年出非偶紫氣

雖沈猶旁斗時來得佩君子身老狐潛形木魅走嗚呼
此物不用彈侯門侯門仁義非純真亦毋借與斬佞臣
佞臣哩濡噴血腥一朝提向白帝子辟易萬里黃沙清
我歌寶劍神激烈霜鈔雪花今不滅用之失所同鉛刀
世人空自侮神物風胡不可期明晦自有宦君看繞指
風塵日何若潛光古獄時

長發曰命意高迥元振
樂天而外罕有其匹

臨江王節士歌

黑雲崩奔海氣惡霜風萬里勁鵠鷃長弘血色照高楓
易水濤聲走枯檣節士感此神慨慷起拔雄劒擊大荒
苔生繡澀非無意一朝掣電揮寒鎌斬鯨鯢跨溟渤紫
髯一張蝟毛磔履腸涉血噴始平夜夜天街看太白

無殊曰力摹古
調是樂府本色

精衛詞

移山驅石未足奇精衛乃欲填天池朝發發鳩暮滄海
口銜木石雲中飛飛來咯咯作人語只為當年死水渚

大造何為產不平海水萬里搖空青鞭撻日月無出沒
蹴翻蓬島如瓶瓴精誠自能開浩劫俠俠力與天吳爭
西山草木會有窮愁氣往來終不歇天地沈冥滄海枯
帝女之靈乃可絕

野田行

衰草蘿纓掃行跡野燒連雲古田黑田中丘壠日夕多
蒿露朝朝泣新碧富貴難爭白骨春塚邊松柏辨何人
今日耕犁斲斷瓦玉臺當年棟墮馬

介白曰語簡情

悲唐人妙境

山中早行訪葉天寥先生不遇悵然有懷

崖空木落風修修宿雲羣起巖際流寒猿呼不休
樵徑無人草露稠行盡嵒頭叢桂幽莎亭棐几橫高秋
美人不在空夷猶颯沓空庭響長楸雜花嫣然明廢丘
茲來誰與銷離憂百年心事同沙鷗五湖浩蕩何所投
恨不從公汗漫遊青鞶賣藥南山頭他日相期杜若洲
浩歌一曲烟花愁

節在曰流宕俊逸
柏梁體以此為佳

對酒歌

人生哀樂日異態所以志士多悲歌況我一身備坎壈
萬事零落隨秋莎昨夜商風戰黃葉幾人黑頭驚白雪
葵扇桃笙安可常榮華旦夕成彫歇古今茫茫一俯仰
池臺春草年年長玉燕誰憐漢后釵金盤頓去仙人掌
悲來貰酒黃公壚上聲促節歌吳歛骨古恥與百人會
氣高不踏五侯廬且送懷抱何區區松花飯竹葉醅一

口吹飛劫後灰
崑崙銅柱可倒摧
楚漢戰爭安在哉
海天愁雲萬里來
長生木瓢為君催
如何局促生心哀

安節曰音節豪邁有
爽氣其源出于太白

酬方爾止見懷兼送之金陵省侍

昔年偕子瓦官宿
風雨寒燈嘆聲續
漢家火井誰更窺
葛嶺堂前散樺燭
荒臺含淚數歸鴉
廢苑臨風弔平綠
余感秋菰歸故園
子隨氷泮出國門
何地登樓堪作賦
蘇臺空望灞陵雲
須臾鐵甲彌吳市
共道花源在江渚

輕舠汎汎荻溪深。暫眼逢君驚且喜。多君勗我青琅玕。
蒲塘拭淚起長嘆。世事正疑峰九面。人間難盡磴千盤。
永嘉僑客本無家。笠澤春風十畝賒。豈意下江兵。忽起
庾村謝墅偏悲笳。子念高堂理須去。霜籜千林照歸袂。
道上猶聞建業鐘。雲中不辨景陽樹。桃葉桃根且莫歌。
薛蘿應訪舊巖阿。南國香銷白日暮。北山芝長丹霞多。
他時重憶吳淞月。吾將與子同漁蓑。

弱翁曰：纏綿婉麗，序次有倫。
在唐人中為劉夢得一派。

金石錄卷三

訪顧樵水

卷三

空城來往但榛礪惻惻寒螢啼路側徙藥尋君立板橋
野葛覆垣改行跡池邊瘦草不勝霜林外閒花似相識
吾歌子謠悲復悲疎雨深烟織空夕

贈陸鳳華

聞陸有却金之
事作此贈之

故人獨子青松枝顚頷江頭歌式微破椽止許安鄴架
一生不解食熊肥江河逆上老蛟立草木無英朱鳳飢
每感緇塵染素練曾聞杜老辭禱段欽子高風近古人

澗底粼粼青石見吾願崑岡蹋倒海塵飛勿生綠玉與
明珠珠玉能令生命賤采之失却千金軀不如登讓山
汲廉水東郭蕭條躡芒履危機不中飛流矢

介白曰語有關係高岸
寄欵全得少陵氣骨

夢桃源

漁舟一出迷去津靈蹟常韜萬古春夾岸桃花復何有
至今空說武陵人武陵桃花隔深碧春山夢回忽如覩
落英潭島正紛紛桑竹千村盡烟客雲林不辨春與秋

瑤草丰茸滿香陌時陳俎豆非人間望見衣冠多古色
野老相逢無白頭飢向松根斲芝朮巖徑千盤花轉迷
碧流深淺無人知石上烟霞還拂枕洞中雲露不沾衣
靈境恍惚那能駐覺來猶見仙源樹蜃樓幻轉不須臾
世間誰得避秦處是仙是隱不須驚夢裏相尋身亦輕

茂倫曰秀麗綿芊興懷隱約
可與摩詰桃源行相伯仲

楊白花

楊白花飛飛落何處高樓千萬重宛轉從此去迢遙遠

道歸無期願得日夜南風吹吹著楊花入懷抱妾顏長

比陵苔好

安節曰只未二語已極纏綿勝人多多許

潘江如遊閩過別託訪何玄子葉敬甫諸公事蹟
北風獵獵寒流澌黃塵黑霧吹人衣春日不出出亦瘦
空庭老樹號飢鷗君來過我何奔迫撲被因人將遠適
為君起歌行路難滿眼艤艤暗金戟驛鰐不得驂弇山
空效罷牛走塵陌君今東去經仙霞仙霞戰骨堆如麻

千山落日依殘壘八郡空城噪晚鴉當年軼事恐磨滅
納肝斷腕堪咨嗟君去為我齋油素遺民覩記應無誤
碑版佚文尚可搜屠酷異士當一遇作賦登高莫漫誇
酒酣須唱丁都護漲海茫茫鴻雁稀到時將及荔支肥
波濤翻覆非一狀待爾同釣滄江磯

介白曰七古之妙全在音節頓挫此作兼有青蓮少陵之長

楓江酒船歌贈余澹心

余子白皙烏衣郎楓江酒船琴瑟張擣箏美人坐兩旁

參橫月落方浩倡痛飲不空金錯囊君才固空草明光
何為浪跡長滄浪誦君長句氣莫當少陵野老堪頡頏
誰同調者萊陽姜君今顧我浣花堂石闌滿徑生清香
矯首咄咄望八荒高歌嶧幘神洋洋黃公酒爐典鷓鴣
惜君去鷓飛方塘西湖曉儻施新粧夾岸官槐鼠耳黃
櫂歌中流樂未央鬢洛浦貽明璫為君作歌肴色揚
楓江酒船酒難量歸時無及雁南翔重來就我彈清商

無殊曰風流駘宕想見
李青蓮遊郎官湖時

茂倫席上晤胡彥遠丘季貞姚仙期漫賦

人情似秋雲俄頃異好醜蘭艾同東新文章棄芻狗感歎中園葵妍華竟何有社燕春復秋變衰豈云久得喪理本齊何事營身後宜彼賢達人揮金適拊缶顧侯磊落多古情襟期每為高士傾座中三子湖海英剪韭擊鮮樂事并觥船初泛箬下清瞳目直視無公卿滄浪逸興浮軒檻起視高樹明星橫搔頭浩歌棲鶻驚天蓮物情已如此紆金饌玉徒營營今我不飲將何成

介白曰興會甚高豪
宕激越樂府遺音

張公藥囊歌

張公藥囊手提攜不入吳市貪山棲淳氣堪編孝友傳
道風恒與烟霞期南州高士人共棄惟君往來慰顧賴
今雨交態安足論寒山白雲照明義我亦病叟違世情
書籤藥裹愁零丁會當結侶礎村北燃松摘薤盃同傾

安節曰語不必多意味
已足有岑參李順之風

苦寒行

頃帝寒威何酷烈東南地維逆將裂太湖堅冰百丈深
魚龍潛竄重陰穴千村惟見凍凝雲萬頃不聞濤噴雪
西風日吼天地昏估客漁翁往來絕瘦日隱見無晶輝
鍾山燭龍光欲歇雖然陽氣終回旋可忍罷民重酸切
官稅榜笞隸已枯天行嚴凜骨還折時聞艇子陷冰圍
絕炕隕命龜鼈窟兼之茆屋僵赤膚妻兒號寒忍嗚咽
嗟乎彼蒼何夢夢水旱頻仍不堪說復見殺氣東南行
炎滌荆吳恐仍結君不見千戶封五陵俠軟裘快馬出

京闕誰信無衣叫寒月

宗定九曰語出沈痛能感愴人樂天泰中吟之流亞也

山石次昌黎韻

山石歷亂凌翠微
楓杉十里蜻蜓飛
百道細泉流木末
黃梅雨過楊梅肥
入寺不聞聲剥啄
啄花龕半掩人來稀
老僧睡起偏袒坐
飯我青精克我飢
須臾策杖出平莽
半山鐘磬聞禪扉
丹梯徑斷樵牧絕
祗見嵌竇烟雲霏
巨石蟠孥立猛獸
翠屏却畧如長圍
緣源萬轉興未極

松花拂拂沾人衣此中仙靈真髣髴何用刺促隨馬鞭
願得息機混蟲鳥攜家采藥長不歸

送潘次耕北遊

崑崙木禾天下無當其未發同枯株潘生嶄嶄露頭角
何異瓊藥方敷腴哲昆文章嘆零落賴子收拾灰燼餘
十載悽涼歌隔谷至今神色慘未舒高氣已足空九縣
健筆更欲凌三都新詩起予奪老眼羽翮絢練珠璣鋪
今來別我適遠道擔簳直走無所須齊魯燕趙多奇士

子去豈憂吾道孤鹿城顧子人久作客為我傳訊今何如

安節曰昔人謂謝朓詩工于發端此作發端絕妙以後亦屬落有氣

姑蘇臺感懷

荒臺碧血秋光老西施行處寒煙遶戰壘年年換綠苔
白雲不散吳宮草西山月影弔麇踪錦帆涇外濤聲小
花落烏啼黯斷魂越臺榛蔓共黃昏興亡長恨何時盡
霜葉飛飛帶淚痕

梁溪歌贈吳伯成明府

有序

錫山古邑梅里遺墟為南北之要津實往來之綰轂
地饒陸海連吳會以稱雄才聚清華鬱岡巒而起秀
幅幘式廓多鄰蠹鼯之鄉災沴頻仍屢遭波濤之阨
沃壤幾為彫瘵人文漸已榛蕪茲遇伯成吳公嵇山
挺秀劇邑分符翦江國之雲霞織成錦段入鄧林之
根節試厥硎鎚清映冰壺橐止胡威之絹惠零甘雨
車隨好畤之烏九陌晴花候鳴絃而獻笑千村社鼓

迎墨綬以興耕賦額登而罰弛筆楚馴良悅而音變
鵠鷗治最既優儒風斯振笙簧藝府鼓吹文園尋勝
蹟于丹梯集諸生于白社憑林起棟即沼疏泉分魚
鳥作三行列煙花為七覆既援枹而橫筆陣亦摩壘
而厲辭鋒五部湖前仙舟對擢九龍山外落紙時飛
斯又軼懷縣之風流追蘭亭之勝事矣不佞齡陋似
太冲渴同司馬雲山在望一櫂猶阻于闕津儻頌頻
來百里自通乎河潤神往烏皮之几夢游嘉樹之林

茲者政登上考時值生申榮光動于北辰景曜逢乎
南極躋公堂而獻壽早見幽風采輿誦以陳謠嘗聞
古老爰申小詠敬播德音乃為歌曰

維彼梁溪兮環江匯湖水滔天兮民為魚嗟彫敝兮誰
與蘇公之來兮濺澤敷弛威罰兮响鰥嫗感德意兮爭
輓輸犬不驚兮吏不呼揚文治兮禮耆儒捐廉橐兮慰
窮塗振風雅兮黜皇華公之澤兮流具區介春酒兮傾
百壺願他年兮秉化樞惠我民兮長賜醕

重過四雨閣有感

有序

王荊公稱梨花一枝春帶雨珠簾暮卷西山雨院落深沉杏花雨桃花亂落如紅雨皆警句嘉隆間周文學公瑕以四雨榜其閣一時文士多讌集于此三十
年前余嘗館其地

歲久不到闔閭城重來舊館門闌更鄰翁為引蓬蒿徑古樹猶喧鳥雀聲百年以前公瑕宅竹林魚沼紛遊屐桃花梨花爛漫開閣中屢見鋪瑤席篆隸早師待詔公

豐碑大碣求絡繹余昔館此勝蹟遙景物尚未全蕭條

同舍黃翁善章草清宵得句時相挑

黃翁元國嘗有句云月來天地皆成

水雨過煙雲總
是山人多稱之月采照池流綺練花容臨榻勝妖嬈四

十年來時屢變春燕秋鴻不相見步屢重來百感生野

覓青青為誰舊斷橋缺板草侵蹊卧柳生枝蟬聒院閣

鼓無復榜高懸蛛網蟲絲撲人面吾生已見升與沉何

論當年盛文讌嗚呼世間萬事如轉蓬清賞勝遊君莫

羨兜葵蕪麥昔繁華梓澤平泉今甫窶

音剴穿土葬也
甫窶見周禮

池臺若可鎮長存玉兔金烏足不奔

汪周士曰聲情嗚
咽如聞雍門之泣

湖翻行

庚戌六月十二日

太湖西來天目源七十二溪波濤奔震蕩有時溢原野
未聞浩瀚迷乾坤五月稻秧齊插蒔三旬霖雨水澎湃
方憂漏天移澤國忽駭狂瀾卷平地颶風猛發神鬼愁
火龍擲火驅潮頭漂砂礫石失垠岸發屋拔樹蟠蛟蚪
聲如列缺鬪霹靂勢如共工傾不周乘陵城郭墮欲倒

千廬萬竈皆洪流巨浪翻騰高屋過大魚撥刺平衢游
更憐人畜死無數浮轡塞港漂難求百歲老翁驚歎久
此災邑志從未有乘船入市何足云地軸翻天浸星斗
我時惶遽無竄逃急上高樓守簾竟日魚釜無炊煙
澆愁何處沽村酒變不虛生豈偶然撫時感事心欲嘔
盛朝蠲賑猶未遑長吏敲榜肯停否欲訴真宰天茫茫
九關虎豹狰獰守吁嗟蒼生爾奈何但見號咷走童叟

刈稻行

壬子

老農腰鎌趁晴獲短禾滿把歎聲作今年雨暘頗失調

飛蝗雖過未為虐苗莖苗葉無損傷臭蟲潛生根底蠹

臭蟲名負盤
見爾雅注

芒粒稀疏穗不垂禾根浥爛氣殊惡田家

無望囷粟登終歲辛勤空錢

翦

鉢兼之縣官急索租簿

吏登堂恣鳥攫脫粟一飯抵玉炊敢希春杵得精繫老

農切切陳哀辭問我何法充朝饑我聞此言再三歎由

來荒歉非一貫大無麥禾紀春秋其年無水亦無旱土

膏不發穀不成魯史特書闡治亂三國孫吳亦有之沈

約宋志文可按民生三代後性命全倚天天若不憐徒

顛連我曹槁餓不足道恐兆兵氣心焦然

明年果有
滇南之變

吳慎思曰二詩皆紀時變真抑揚哀怨之章當以陳之采風者

寧都魏凝叔惠貽易堂諸子文集

文章氣節古一之立言豈是脩曼辭揚雄美新入文選
蕭統無識徒貽嗤唐宋以來文匠八門奧各出推導師
柳州躁進荆公執尚于大義無瑕疵皇初希直實巨手
崆峒南城老筆披荆川遵嚴與熙甫沿泝均出歐曾規

弇州才大一時傑此後作者誰能追西涯詩文敗嬰匿
當時正論多詆謔奈何談者好軒輊一禰一祧任意為
未聞身名已瓦裂能立壇坫持旌麾易堂風節吾所畏
文筆賈勇相切劘翠微峰前魚鳥樂碧桃紅蕖爛漫姿
觀彼論撰頗英鷺起哀振靡實有期我亦永懷不朽業
志大力小空逶迤兩目眇昏足尚健欲向勺庭捧盤匜
安得插翅墮爾前黃絳青鞶白接離離經酌史無晨夕
同斲茯苓松下炊

卷三
吳園次太守惠貽林蕙堂文集

徐陵玉臺尚俳儻文章流別日以興齊梁清麗賞杜老
萬古江湖四傑稱西崑創自玉溪子自比六博未足矜
楊劉刀筆矯永叔是後作者無精能今日文瀾遞流行
麗則清聲筆誰倩翡翠蘭苕容色鮮前有茂苑後陽羨
延陵筆底騰煙雲夏玉鏘金工獨擅省郎出牧官不卑
解組吳興作羈宦脫駿分宅古人風衣被寒士情無倦
竭來車馬駐荒郊白蘋清風猶拂面鴻章拱置几案間

直當一字酬一絹願攜海南沈水香日供茂先青鐵硯
董如齋太史宅觀趙文敏百馬圖及仇實父蘭亭

會真二手卷文太史墨蹟酣飲醉歌同沈香山作
太史好事賞鑒精閥閣藏弄皆藍瑛鑪香馥郁舜飲清
示我畫圖心眼明松雪王孫好畫馬神妙不在江都下
貌得賢王出獵圖毫素疑有神功寫錦襡繡帽雙辮垂
萬蹄攢迸流星馳風鬟霧鬢盡騰躍意態變化如奔螭
僵禽斃獸十七八一箭射殺斑黃熊對此陡覺鼻生火

想見意匠經營苦文采風流後邈然待詔文公踵其武
同時又有仇十洲人物畫苑稱最優蘭亭勝遊擅六代
會真香艷空千秋妙染一一見生面况有待詔舒銀鈞
一臨河南筆力健一出小楷風神迺此皆盛世巨手筆
仙官恐遣六丁收君從何處得墨寶珍護應比璆與球
玩久卷圖三歎息暇日清娛難屢得日中跋烏足不停
海上神鼇頭欲側時京師適東地屢震吾來笑摘黃金花起汎瑤
尊蕩愁膽翰墨奇觀次第披此身如置華胥國酒行到

君君莫辭醉鄉萬事無偏仄

王丹麓曰抗壯淋漓
運用斡旋具見手法

贈海寧許酉山明府兼訊黃太冲

許夫子今儒英軌百里文治成廣筵列坐諸經橫橋門
觀聽羅瓊珩綠絃歌吹相和鳴春容叩擊春風清豈徒
德惠流歡聲仲淹牛溪述王道一時高第皆公卿鶩湖
白鹿開講院剖析聖義晨星明至今正學不墜地恃有
巨手能支撐考亭象山宗旨合虛實二教理兩行奈何

後人判塗畛祖分左右紛呶爭文成立說教章句虛無
豈與竺乾并俗學肆口恣掊擊無異同室分旗鎗我欲
融釋歸大冶一銷文墨與墨兵所恨身賤才力薄徒抱
遺書守紫荆公今講壇臨浙水務使學者閉羣盲兩家
鬪詬果何益貴出衷論持權衡若晤姚江黃處士為言
嚮學有朱生

愚菴小集卷三